

IZKIÑOSUA ETA ZOZUA.

Putzu zuluan zebilelarik
Jostatzen izkiñosua,
Azkar zitzayon sasitik jechi
Bere albora zozua;
Ta ikusirik galdetu ziyon
—¿Zer zabiltz emen zorua?
Ez nuben uste ziñanikan zu
Orren piñti iñozua.

—Ni iñozua izanagatik
Ez dizut zuri zorrikan,
Izkiñosua naiz ta ez daukat
Zozo charren bildurrikan;
Ez nazazula aserrerazi
Zoazkit azkar ortikan,
Bestela zure buru char orrek
Ez du izango otzikan.

—Zozua naiz ta ez nau beñere
Izkiñosuak izutu,
Ez eta ere berriketakiñ
Ikaratu ta kuškurtu;
¿Uste aldezu bildur gaitzetik
Naizela iñoiz kutsutu?
Bada zozorik izkiñosuak
Ez du beñere mututu.

Borrokatu rik biyak ziraden
Putzu zulora erori,
Non itorrikan bukatu zuten
Beren aserre char ori;
Ispillu ona agertzen digu
Ipuicho onek danori,
Jakín dezagun bear ez dala
Gerrarik jarri iñori.

JUAN IGNAZIO URANGA.